



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakngma :

f Tir Yimyim

ig tiryimyim@aolima

yt tir yimyim

TAPAK 6

Biden tashi maitba agi kiralongrar temolung ulur: Trump

Taoba MLA Emmanuel Mosahary-i BJP toktsüogo



VOL. XXI NO. 02 (ADOK 02) DIMAPUR

TENTONÜ (MONDAY)

MONGPUTENI (OCTOBER) 09, 2023

₹ 5.00

## GB Abdul Talukdar mapa nungi anenja atar

**Dimapur, October 8, 2023 (TYO):** October 8, 2023 nungi tenzüker ita asem tashi Abdul Kayum Talukdar New Market GB nungi anenja ataba metetdaksüogo.

Deobarnü Dimapur District GB Association aser GB Union Dimapur Sardar rongdak senden ka amendang iba lemtet agi.

Fact Finding Committee ajanga Abdul Kayum Talukdar ya non-indigenous nisung ta bushitetogo aser iba atema parnoki district ketdangsürtem dangi shidi ka zülüsü ta Dimapur District GB tanishirtemi ashi.

Abdul Kayum Talukdar-i ita asem tashi New Market GB nungi anenja atar aser iba mapang New Market nung Naga nung GB-i mapa inyaka atatsü ta parnokisa ashi.

Talukdar ya Khatkati nung alir ta nisung aikati ashiba atema Fact Finding Team-i bushitepa aodang pa indang Aadhaar card, PAN card aser Voter ID car nung residential address ji New Market ta zülua aliba nguogo saka iba

atema balaka meshiteter, ta parnokisa ashi.

GB ka mapa nungi anentsütsü onok dak tashi mali kechiyong GB ya sorkar ajanga dang shimer ta parnokisa shisem.

Dimapur GB temisa RPP President Joel Naga-i urban GB mali tajungba ta ashiba aitsüba metetdaksüogo.

Indian Constitution nung Arrla 371(A) ya Dimapur district nungbo mapa küma meinyaktetsü ta Joel-i ashiba aitsür kechiyong Dimapur ya Naga nung meyong lir anungji Arrla 371(A) beshitettsü ta Dimapur nung GB temisa jangjatsüogo.

Parnokisa Joel dang pai jembiba o memeyipsai osangkaket nung pai jembiba onük jangjatsütsü atema metetdaksüogo

Dimapur ya taoba mapang yimtsüng ka dang liasü saka tangi jila kümogo aser colony 97 lir. Colony 97 nung GB 600 tema lir anungji kodaser Dimapur nung Arrla 371(A) mebeshitettsü ta parnokisa asüngdangogo.

## Manipur minister ki amakba atema lungkak ait

**Imphal, October 8, 2023 (Agencies):** Honibar aonung Manipur cabinet minister Yumnam Khemchand'er kima nung bomb pokdaksüba anema Deobarnü lungkak aitba sentong ka ayonga agiogo.

Iba lendong ya Imphal West district kübok Yumnam Leikai nung atalok.

Iba lendong atalokli Manipur Chief Minister N Biren Singh-i tesem tonga ao aser bushisüngdang ka asütsü tetuyuba

agütsü.

Deobarnü Singjamei Meira Paibi groups (Women's Vigilantes of Singjamei) ajanga mener lungkak aitba sentong ayongzüka agi.

Manipur Rural Development & Panchayati Raj Minister Yumnam Khemchand-i ashiba agi tang tashi nung pa amokmerenba osang kecha mali.

Honibar aonung 9.45 ako meta bomb apokdang CRPF Sub-Inspector ka aser tanur tetsür ka yiru.

## Delhi nung Chakhesang People's meet agi

**Kohima, October 8, 2023 (TYO):** Honibarnü Chakhesang Students' Union Delhi ajanga Chakhesang People's Meet 2023 ayongzüka agiogo.

Iba sentong ya NDMC Convention Centre, Sansad Marg, Delhi nung agi aser Power and Parliamentary Affairs Minister KG Kenye-i alaketa jaoker ka ama shilem agi.

Sentong nung CAWD Advisor Küdecho Khamo-ia tetushi tejaoker ka ama shilem agia jembidang takok angutsü merangsüba indang ashi.

"Asenok takok angutsü mepungmangi meranga inyaksüla. Tanü asenoki inyaktetba ajanga asen tarutsü tia yanglutsü" ta pai ashi.

"Takok anguba nisungtem dak sempet balaka aliba masü saka parnoki alizüngtem atongtsü atema meranga inyaker. Anungji

iba sentong nung adenertemi nija alizüng, tenüng tajung mesüra senotsü azükarutsü atema dang masü saka Tsüngrem sentsüwangshidaksütsü atema merangtsüla" ta Advisor Khamo-isa ayongzüik.

Paisa Tsüngrem den sarasadem ajanga sendakteptsü aser Laishiba teti azüngtsü ayongzüik.

"Tanü asenoki ajuruba tayongzükbatem ya tamangba tanüla tsütsü anünga aliba ajanga ajuruba teimba lir" ta paisa ashi.

"Alima nung tetoktepa aika liaka Tsüngrem tsübur aser mapa meranga inyakerem asoshibo takdang lir. Nisung ajaki asen tamangba yimsü kümzüka ayutsüla aser kolenisa odir oaka Yisu Khrista asoshi ambassador ama alitsüla" ta Küdecho Khamo-isa metetdaksü.

## Meghalaya nungi temeshi aini aoertem Egypt-i anienogo



Gaza Strip nungi Palestinian telok Hamas-i Israel tsütsü rocket khaloktsüdang agiba noksa ka angur.

**Guwahati, October 8, 2023 (Agencies):** Israel-Palestine rara ajanga Meghalaya nungi temeshi aini aoer nisung 27 tashi Bethlehem nung anendaka lir Deobarnü parnok arrtsü adener Egypt tongogo ta Chief Minister Conrad K Sangma-i ashi.

"Osang angazükba agi MEA aser Indian mission teyari ajanga Meghalaya senso 27 tashi Egypt tongogo" ta Conrad-i ashi.

Honibarnü Chief Minister Conrad-i Indian Ministry of External Affairs (MEA) dang Jerusalem-i temeshi aini aoba Meghalaya senso 27 tashi anir arutsü atema teyari meshia liasü.

Israel nung Indian Embassy ajanga India senso ajak dang kümdanga alitsü aser ketdangsürtemi ashiba safety protocols sülen anidaksü ayongzüokogo.

Kiralongrartemi Israel amakba osang angashia kanga

aoksar ta Prime Minister Narendra Modi-ia metetdaksüogo.

"Onoki tai maketba nisung asüba aser parnok kibongtem asoshi sarasademtsür. Iba mapang tamajung nung onoki Israel den külemi noktaker" ta PM Modi-isa ashi.

**Israeli Defence Force-i linük kümzüka ayutsü meranger**

Deobarnü Israel-i tayimtsü ajanga Gaza amakdang Palestinian telok Hamas kiralongrar 400 tema tepsetogo ta metetdaksü.

Hamas-i kanga dang ajungbena 'Operation Al-Aqsa Flood' ta ser amakba sülen Israel-i "state of war" metetdaksüogo. Hamas-i Israel anüolentip tsütsü aliba jilatem nung 3,000 rockets khaloktsü aser amak.

Israeli Defence Force-i Gaza Strip nung Hamas kiralongrartem den khatepba mapang Lebanon

nung Hezbollah group-ia Israel tsütsü rockets kar khaloktsü.

Iba sülen IDF-i Lebanon nung Hezbollah teseptem amak. IDF UAV kati Mount Dov nung Hezbollah terrorist infrastructure poksatsüogo.

Külen, Israel air force ajanga Gaza nung maneni tayimtsü amshia tesem 426 makogo ta Israel Defense Forces (IDF) spokesperson Daniel Hagari-i ashi.

Gaza strip nung nisung 232 aser Israel nung nisung 300 tema tepsetogo aser 1500 tema yirua lir.

Honibarnü Hamas-i Gaza Strip nung rockets aika khaloktsüba sülen Israel anüolentip tsütsü amaktsü tenzüka liasü. Küm aika sülen iba ya lendong tamajungtiba atalokogo ta Israel national rescue service-i metetdaksüogo.

## Sikkim tzümetsüng lendong nung tasür 32 kümogo

**Gangtok, October 8, 2023 (Agencies):** Sikkim nung Bodbarnep tzümetsüng lendong atalokba sülen tanü tashi nung tasümgang 32 ngutetogo. Tasürtem rongnung Army 9 densema liasü.

Tang tashi nung Pakyong nung tasümgang 21, Gangtok nung 6, Mangan nung 4 aser Namchi nung 1 ngutetogo, ta Deobarnü ketdangsürtemi ashi.

Tzümetsüng lendong ajanga nisung 41,870 dak kongshio. Tesem balala nungi nisung 2,563 kümzüokogo ta Sikkim State Disaster Management Authority (SSDMA)-i metetdaksü.

Maneni nisung 122 samar bushitepdar. Pakyong district nung nisung 78, Gangtok nung 23, Mangan nung 15 aser Namchi nung 6 samar bushiteper ta SSDMA-isa ashi.

North Sikkim nung Indo-Tibetan Border Police (ITBP)

ajanga civilian 56 kümzüokogo.

**MoS Home Ajay Kumar-i CM Tamang den ajurutep**

Minister of State Home Ajay Kumar-i Deobarnü Gangtok nung Sikkim Chief Minister Prem Singh Tamang den ajurutepa senden ka menogo.

MoS Home Kumar-i anogo ananü atema Sikkim semdang aser pai Chief Minister Tamang den tzümetsüng dak sendakba osangtem lemsatepa liasü.

Prime Minister aser Home Minister nati Sikkim Chief Minister den maneni tongteprateper aser teyari agütsütsü atema Centre sorkari telok ka tentetogo ta Ajay Kumar-i ashi.

Agriculture, transport and highway, power, water supply aser sendaktepa aliba ministry ajak nungi shimtetba telok ka onoki Sikkim-i yoktsü, ta pai ashi.

Chief Minister-i kanga meranga inyakdar. Pa lenistüba kübok state sorkar ketdangsürtem mapa inyaker. Prime Minister aser Home Minister nati ITBP oNDRF dang Sikkim-i aotsü tetuyuba agütsüogo, ta MoS Kumar-isa ashi.

MoS Home Kumar-i Hokolbarnü Gangtok atong aser pai Honibarnü Rangpo nung tzümetsüng ajanga kongshiba tesemtem semdanga senzü.

Yashi Kumar-isa Chief Secretary aser state sorkar tongti ketdangsürtem den senden ka amen. Iba senden nung Army, ITBP, BRO, NHIDCL aser NHPC ketdangsürtem aden.

MoS Ajay Kumar-isa yashi Sikkim Governor Lakshman Prasad Acharya den Raj Bhawan nung ajuruteper aser idangji Centre-i akokba tashi Sikkim yaritsü metetdaksü.

# Kats Collection Top Model 2023 agiogo



**Dimapur, Mongputeni/Oct. 08 (TYO):** Kats Collection Top Model 2023 sentong sentsüpranga Hotel Acacia, Dimapur nung October 7, 2023 nü agiogo, kong arishi küm 20 tain Moakhumla Ao-i senpet sen 50,000 den Kats Cosmetics nungi sempetlep aser Kats Collection den küm ka contract ngua liasü.

Write Kreo nem Miss

Congeniality sempet agüja liasü. Iba sentong nung tetendangertem ya Visituonuo Rio (Brand Head), Opang Jamir (Creative Director), Kuvelu Tetseo aser Annalia Zhimomi nungertem liasü.

Iba tetoktepba nung takok angur osang ya Nini Sekhose (Chairman, Little Star Higher Secondary School & Pastor, GMC, Sovima) ajanga sangdonga liasü.

Top 5 Finalists tem aruya aliba shows nung tokteptsü maongka angutsü aser takok angurtem brand balala den lungjemer 'exclusive shoots' alitsü, ta Brand Head, Kenny Rio-i ashi.

Iba sentong nung host ya Ruopfüzhanu Whiso, Femina Miss Nagaland, India 2018 liasü aser Thunglamo Nnullie, Kuputo Wotsa, Ale & Brooke nunger temi ken aten.

# Assam Rifles temi 'A Day with Company Commander' sentong agi



**Dimapur, Mongputeni/Oct. 08 (TYO):** Assam Rifles temi 'A Day with Company Commander' omen kübok Bright Light Choir Team den sensaksemba sentong ka October 7, 2023 nü Kashiram

Basti, Dimapur nung ayongzüka liasü.

Iba mapang Assam Rifles Movie ka sayua liasü, kong sepaitemi tasü ita aser bendanga agütsür inyakba sayua liasü.

Iba sülen Jazz Band ajanga

telok ayongzüik. Iba sentong nung parnok tsüngta musical chair, arr atsütepba amala inyakyim agia liasü.

Bright Light Choir Team nungi kaketshir 14 den tesayur ana arua liasü aser parnoki Quarter Guard densema company operating base nung tesem balala semdanga liasü. Iba maongka ajanga Bright Light Choir team-i sepaitem inyakyim balala tali tajungba nung angateta liasü.

# Eco Tourism & Environment atema seminar agi



**Kohima, Mongputeni/Oct. 08 (TYO):** Honibarnü Mezomia Me chu Kehou (MMK) ajanga Mezoma yimdak nungi tetsür aser lanurtem asoshi anogo ka Eco Tourism and Environment nung seminar agüja liasü.

Tetsürtem asoshi seminar ya Mezoma Village Council Hall nung agia liasü, kong Naga Spices & Herbal Research Institute, Kohima indang kibur Abea Mero shisalen sayur liasü aser lanurtem asoshi seminar ya GHS Mezoma indang auditorium nung Founder, Music and Arts Institute, Hope Center

for Excellence, Dimapur, Zubeno Mozhui shisalen sayur sür agia liasü.

Sikkim ama kidanger state aser Himalayan range nungbo Eco Tourism nungi nüburtem chia-jema liteter saka Naga nungerbo tang tashi 'political methods' nung metaloka alir aser ibaji ajanga yimtenren tsütsü telemsa tali adoker aser terenlok tsütsü loktiliba nunga kongshir, ta Mero-i ashi.

Mero-i Mezoma nung tetsürtem dang mozü mamshi aonsotsü tsünüa amshitsü ajungshi aser indigenous oset ayokba market, museum tem

lapoktsü aser monü amshia resorts amala yanglutsü ajungshia liasü.

Pop rice, Naga apple juice amala süngianglijang lu ayimba ajanga rongsen tali arutsü, ta lai ashi.

Shisalen sayur Mozhui-i ashiba agi, hospitality sector, talisa rural home stay amala nung rongsen lenmang tajungba lir aser kasa mapang sobaliba aser yimsü-yimbonga ajungketer.

Lai lanurtem dang homestay temürek yanglua amshitsü ajungshia liasü, kechiaser itemji ajanga tourist tem atsür arur.

# Nagaland Angh aser Dy. CM ajanga Tsonglak-Nyi benjong salem abener

**Dimapur, Mongputeni/Oct. 08 (TYO):** Tsonglak-Nyi benjongmung tenüng nung Tikhir adianu aser adianutsür tem dangi salem abener, ta Nagaland Angh, La Ganesan-i sangdong ka ajanga ashi.

Tsonglak-Nyi ya temeshi akumba aser asüngtetba benjongmung ka lir. Iba mapang sobaliba tsüingsang, ken aser nüburtem külemi chia-jema longsopter.

Iba Tsonglaknyi benjongmung nüngtem nung Tikhir adianu aser adianutsür tem dangi salem abener aser iba benjongmung ajanga nüburtem tsüngta telungiem tali adoktsü

imla atar, ta Angh La Ganesan-isa ashi.

Deputy Chief Minister, Y. Patton-i Tsonglak-Nyi benjongmung nüngtem nung Tikhir kin den salem lemsatepa liasü.

Iba bejong ya talisa nok-nü aser jong meshitetba benjongmung ka lir, koba kanga tongtipang lir, kechiaser raratsü aser takum kumzüka alitsü asoshi itemi kanga tongtipang liasü, ta Dy. CM, Patton-i ashi.

State BJP legislator tem tenüng nung ajak dangi Tsonglak-Nyi benjong salem abener, ta sangdong ajangasa ashi.



Maple Tree School, Dimapur nungi Grade 3 nung azünger Kittiya Soyah-i English oshi nung züluba "Sasha and Layla" kaket October 7, 2023 nü Good Shepherd Music Academy, Nepali Basti, Dimapur nung Rongseninla (Rtd. Director, Dept. of Agriculture) ajanga sayatsüba mapang tangokba noksa nung angur. Iba kaket ya Heritage Publishing House-i menünga liasü.

# Helping Hands, Nagaland for South East Asia, Asia Pacific and Oceania ambassador ama Rev. Louliehu Yimsung shim



**Dimapur, Mongputeni/Oct. 08 (TYO):** Leaders Arise Nagaland (LAN) Founder; Overseas Naga Association (ONA) nung Initiator aser Kingdom Leaders Prayer Breakfast (KLPB) indang Co-Founder, Apostle Rev. Louliehu Yimsung ya Helping Hands, Nagaland for South East Asia, Asia Pacific and Oceania indang Ambassador ka ama shimogo.

Pa iba mapa nung shimba shiti ya President, Helping Hands Nagaland, Dr. Andrew Ahoto Sema ajanga Dimapur nung October 8, 2023 nü sentong tilaka agidang amokja liasü.

Rev. Louliehu Yimsung ya tang Brisbane, Australia nung alir aser nüburtemi kanga jangja meteta aliba Naga nunger lenir ka lir, shiba Kingdom Leaders Alliance den tesendaktep tajung lir.

Pa Helping Hands Nagaland den sendaktepba ajanga Nagaland nungi nüburtem, talisa kaketshirtem yaritsü, shirnok item region nung alir. Bendang lima nung shia aliba region tem

nung teyari aginer temi pa den lyim@outlook.com mesira +61-432164322 den tongteprateptsü akok.

Helping Hands, Nagaland Chapter ya October 23, 2023 nü Founding President, Robin Hibu, IPS, Special Commissioner and ADGP, Delhi Police ajanga semzüka liasü.

Helping Hands ya India nung dangar nem tajangzüik magie teyari agütsüba non-government organization ka lir.

Dr. Andrew Ahoto Sema-i ashiba agi, Helping Hands tenzüka sülen lokti tentet balala den lungjemer inyaka arur aser Non-Naga Community Organizations ya par voluntary partners ama anioka lir.

Nagaland nungi nüburtem India kübok state balala nung alirtem koda masüba mapang rongsen aser nübu agi tajungba nung yariteptetsü, ta pai ashi.



October 08, 2023 nü Varanasi nung Union Finance Minister, Nirmala Sitharaman-i 'Readers Circle of Mental Wellness Week' tetenzük sentong nung jembidang tangokba noksa nung angur.

### INDIA teloktepi linük nung caste survey agitsü pusemer: Sanjay Raut

**Mumbai, October 08 (Agencies):** Amongnü Shiv Sena (UBT) nungi Rajya Sabha MP, Sanjay Raut-i, tang linük nung caste survey nungdaker; linük nung lokti ajak aser INDIA teloktepia caste survey agitsü pusemer, ta metetdaksü.

Tawa Bihar nung Nitish Kumar-i aniba sorkari caste survey agiba osang sangdonga liasü. Bihar caste survey ajanga state nung nütsüing shilem 84 bo backward classes, Scheduled Castes aser Scheduled Tribes nürburtem lir, ta metetdakja liasü.

Osangbenertem den jembidang Raut-i, "Bihar nung caste survey agiogo, Rajasthan

nunga agitsü aser Maharashtra nunga agitsü akhanger. Tang linük nung caste survey nungdaker aser loktiliba ajak den INDIA teloktepia iba ya pusemer," ta metetdaksü.

Chhatrapati Shivaji Maharaj indang keyi temezüing mesükba raraba hadir 'Wagh Nakh' dak sendakba nung Raut-i, Maharashtra sorkari iba nungo ya United Kingdom nungi state-i meyipa bener arutsü ta shiogo, ta metetdaksü.

"Ibaji par mapang meyong asütsüa akok. Ajisüaka asenoki ibaji kanga akhümtsübur. BJP-i temelung raksadaksüba politics asayar. Election mapang nung

nürburtemi Eknath Shinde sorkar anema wagh nakh ji amshitsü," ta pai ashi.

BJP Tir, JP Nadda-i regional party tem aitsüba dak sendakba nung Raut-i, "NDA ji komaser aküm? Party ajak regional lir. Mapang ka nungbo BJP-a regional party akümtsü. Tang BJP maliba state 12 lir," ta metetdaksü.

"2024 küm linük nung politics tashiji regional party temi amshitsü. Atal Bihari Vajpayee leniba nung akümba National Democratic Alliance sorkarjia item ama party tem teyari ajanga liasü, ta Nadda-i mamadoktsüla," ta paisa shisem.

### Sikkim nung atalokba ama lendong agi nisung million 3 kongshitsü

**New Delhi, October 08 (Agencies):** Sikkim nung atalokba lendongji Glacial Lake Outburst Flood (GLOF) ajanga liasü, aser iba ama lendong ajanga India nunger aika kongshitsü temaitsü sayur, ta mongintemi metetdaksü.

Tawa Sikkim nung atalokba ama lendong agi India kübok Himalayan state/UTs trok-Jammu & Kashmir, Ladakh, Himachal Pradesh, Sikkim, Assam aser Arunachal Pradesh nung nisung million 3 shi kongshitsüa akok, ta parnokisa metetdaksü.

UK kübok Newcastle University nungi scientist tem leniba nung international team kati item ama area nung tang

mezüing study süa asadangogo. Alima nung GLOFs ama lendong agi kongshitsüa aliba tesemtem shilem asemsü nungi shilem kabo India aser Pakistan na nung lir, ta parnoki metetdaksü.

Iba study ya journal Nature Communications ajanga sangdonga liasü.

Pasasa akümba tzi tepdang (dam) nung kodang glacial lake burst lidir mesüra kodang awatsüing nung ajungbena tzi tali küma tziükümlen yimdir idangji GLOFs ataloker, aser ibaji ajanga tsüinglanglen alirtemi lendong tulu ajurur.

Himalayan ranges nung glacial lakes 7,500 shi lir aser itemji shilem 10 bo Sikkim nung lir.

India nunger Glacial Lake

Atlas of Ganga ayong nung glacial lake 4,707 shi lir.

Talisa alima tatsükba akümba ajanga GLOF lendong aika ataloktsüa lir; item lendong ajanga tsüinglanglen alirtem jenti kongshitsü.

Bharti Institute of Public Policy, ISB, Hyderabad nung clinical associate professor, Anjal Prakash-i, "Himalayas nung tziümetsüing tali bulua akümba ya climate change den sendaktepa lir. Temperatures tali atuba ajanga glaciers yimsaa aoer. Kodang item glacier (rürjep) kanga kera yimsadir ibaji ajanga GLOF ataloker aser Sikkim nung atalokba ama region nung tziümetsüing lendong ataloker," ta metetdaksü.

### Kibong shia gari telatet dang melatsü sorkar dang mepishir

**New Delhi, Mongputeni/October 08 (Agencies):** 25buba National Conference on Pulmonary Diseases (NAPCON-2023) aliba mapang nung mongintemi India nung mopung tali menenba aser tangu sashiba tsütsü timtem adoka shiranger tali akümba na sendaktepa lir, ta shiogo.

Pulmonology & Critical Care, Jaipur Golden Hospital nung Chairman, Dr. Rakesh K Chawla densema pulmonologist temi sorkar dang mopung tali menenba nokdangtsü atema rongdak süa mapatong tasen kar benoktsü mepishi.

Dr. Chawla-i mopung menenba ajanga temang nung kera kongshiba aser mapang talangka lir kongshiba rasa-a metetdaksü. Mopung menenba ajanga mapang magii kera kongshibaji tenük aser terok mesakba lir aser ibaji tamajungba küma asthma tashidak adoker, ta metetdaksü.

Ano külen mopung menenba ajanga mapang talangka lir kongshibaji tangu sashiba dak sendakba tashidak balala aser tepokpok cancer lir; talisa Delhi ama yimtem nungbo tanurtem tepokpok nung timtem adoka tain akümtsü, ta Dr. Chawla-isa metetdaksü.

Mopung menenba nokdangtsü atema sorkari melungsiä meinyakba atema jashia Dr. Chawla-i sorkar dang kibong shia gari telatetka dang

amshitsü melatsü aser lenmang nung gari telatet dang senzüdaktsütsü atema mapatong benoka inyaktsü mepishi.

Iba tebilemstü nokdangtsü atema tawa hospital 18 senteper medical students aser nurse 1,800 nem pulmonology & interventional techniques training agütsüogo. Anogo ka training ya tangu sashiba tsütsü sendakba tashidak balala tayongzükba koktetsü nükjidong nung healthcare workers renema lidaktsütsü atema liasü.

NAPCON-2023 senden nung Dr. D J Roy-i linük nung tangu sashiba tsütsü timtem bulua akümba, COPD aser tepokpok cancer indang metetdaksüba den külemi item tebilemstü nokdangtsü atema NAPCON-i tongti shilem agiba metetdaksü.

Tepokpok tashidak nung mongin, Dr. Raja Dhar-ia India nung tepokpok tashidak anema raratsü atema nürburtem nem awareness agütsütsüla aser mapang shidak nung iba tashidak puteta treatment agitsüji kanga tongtibang, ta metetdaksü.

Talisa Covid wara sülen pulmonologist society-i tanggu sashiba tsütsü timtem balala atema mozü tajungtiba yanglutsü aser nurse den technician nem training programs agütsütsü atema nendaka inyaker.



October 08, 2023 nü Patna nung Rashtriya Lok Janshakti Party (Ram Vilas) Tir, Chirag Paswan-i tebu aser party tentetsang, Ram Vilash Paswan sür küm ana ajungba anogomong nung tebu nem akhüm agütsüba noksa nung angur.

### Sorkari Israel nungi kaketshirtem anir arutsü: Meenakshi Lekhi

**New Delhi, October 08 (Agencies):** Amongnü Minister of State for External Affairs, Meenakshi Lekhi-i, tang rara adoka aliba linük-Israel nung aliba India nunger kaketshirtem aikati la den tongtepratepdar, ta metetdaksü.

Laisa, Prime Minister's office-i indangindanga iba tensa asandangdar aser India nunger ajak kümzüka anir aritsü atema inyakdar, ta metetdaksü.

Osangbenertem den jembidang lai, "India sorkari Israel nung aliba India nunger kaketshirtem anir arutsü atema inyakdar. Ato kilonser aser pa indang office ajanga iba tensa asandangdar aser iba linük

nungjagi asen kaketshirtem anir arutsü atema inyakdar," ta metetdaksü.

Union Minister-isa, "Operation Ganga süaka mesüra Vande Bharat süaka item mission kübok onoki (sorkar) ajak anir aru aser tang-a India sorkar aser prime minister's office-i parnok den indang-indanga tongtepratepdar aser iba tensa asandangdar," ta metetdaksü.

Laisa Hamas teloki rocket amshia amakdang Israel nung asür kibongtem den Ao kilonser, Narendra Modi-i mangyim jashi lemsatepogo, ta metetdaksü.

"Amakdang asürtem aser yirua alir kibongtem den onoki tejashi lemsateper," ta lai shisem.



October 08, 2023 nü Kashmir nung Anantnag ditricit kübok Sangam nung aluyimertem alurua tsük anetba noksa nung angur. 'Mushk Budji' ya kanga teronem aketba jang lir. Mushk Budji jang nung GI tag lir aser quintal (kg 100) nung sen 20,000 meshir.



## TIR YIMYIM YIMOBILEM (EDITORIAL)

DIMAPUR TENTONÜ, MONGPUTENI (OCTOBER) 09, 2023

### Tain rogotem nungdak jembir

**Y**akanü Chümoukedima district kübok Sumi (Sema) nunger yim Chekiye nung Chakhroma Public Organisation (CPO) aser Western Sumi Hoho (WSH) na telongjem senden ka nung Dimapur, Chümoukedima aser Niuland district kübok alir nübortem tetsübu aser tarendak melii putep-putepa alitsü atema tongtibang onük aika benoka jembiba sendenji, atangji tain rogo adenshir nungdak jembiba tongtibang senden ka asütsü. Parnoki jembiba onüktem rongnung Chümoukedima district tasenba den Niuland aser Dimapur ar ladangtsüba onük dena liasü. Ajisüaka, iba onük dang nungi tongtibangtiba onüktem rongnung Nagaland nung Register of Indigenous Inhabitants of Nagaland (RIIN) sentong ya tekaratiba nung mapa küma inyaksü aser Naga yimten nüchiso bushir telok balala paikati kümer sarusachi zünba agi Naga nunger lanurtem business junga tenzüka mouteti timtemba tebilemstütem benoka jembiba jagi Chakhro aser Sumi nungertem dang masü saka Naga nunger songjen tajangzük angutsü. Alima nungsa alir asüyonga Naga nungertem yabo kin ka aser oshi ka dang masü saka kinsa kin agi akümba kin ka lir, anungji tangari majangshiba tebilemstü aika Naga nungertemibo ajangshir. Item tebilemstütemji teimbaka asenoki asenoksasa yangluba tebilemstütem dang lir, anungji tangar dang aija mesüra tangalen nungi kari arua asen tebilemstü koktsütsü amai bilema mekazüi Chakhro aser Sumi nunger amaji Naga nunger o Naga nungertem na ajurutepa shisalemsateptsüla. Atangji, tesem aisülen kidanger asüba agi Chakhro nungertem o Sumi nungertem na tsüngda mapang mapang shia ali tsütsü mangtettep adokba angashir, ajisüaka tang amaji kibong ka chir ama kümer mapang shia ajurutepa shisa lemsatepra kin ana tsüngda meputep alibaji yim ka ama putepa kümer alitsü. Asenok shisa agi matong aser merajemer dang ashi, Naga nungertem ya kin o kin na tenükmeremtepa nür kin, ozü kin, par kin aser asen kin ta bilema alitsüba kin ka masü, saka akok tashi kibong ka chir ama putepa alitsüba kin lir, kechiyong alima mesama tashi Naga nungerji Naga nunger asütsü aser külemi alitsü. Aji oda, Naga kintem tsüngdangbo tsükchitepa malang, kin tila aser nütsünga ishika. Ibaji kodang asenoki angatetdir, memetetika Naga kin ajak ka küma longjemer alitsü. Ibaji ataloktsü atema tain rogo lenisüba nungdaker. Atangji, yangi shinüba tain rogo tetezü ya tasoba küm kisüng nung aienba masü saka shisatsü aser temetetba nung aienba indang shinür. Tang iba ama nungdak lenisüba ka Chakhro aser Sumi nati agütsütsü tenzüker. Atangji, Nagaland nung, talisa Dimapur, Chümoukdima aser Niuland district-tem nung lisopurtem o lisopurtem masür na mebendangteti kümogo. Iba jagi yashi arurtem dena Nagaland nung kiojen yanglur kibur kümer alir. Oda oda, vote-a parnok teimba küma aotsü, tazüng-temetetba nung shitakba Naga nunger lisopurtemi parnok memeneptsü, anungji Naga nunger lisopurtem nem lezmüksüba medical aser engineering azüngtsüba shilema parnok agiadoktsü aser government mapai aitsü asoshia lisopurtemi bendanger agi lisopurtem akümba purtem memeneptsü. Ibaji tanü ajuruba tebilemstütem lir. Ajisüaka, kodang ibaji menokdangteti odaktsüdir tanü alir semchirsemnur tendakbo shitakba lisopurtembo tangar ki aoker aser kishinüker dang akümtsü. Iba amaji mataloktsü atema, tanü Nagaland nung lisopur jangjatsü atema RIIN nung tenüng zülüokerji shibaa sang, pa mesüra la mesüra parnok tsüraburtem tenüng 1963 küm mezüng adokba Nagaland Electoral roll nung tenüng alitsüla ta Chakhro aser Sumi nungertemibo government dang nenshia metetdaksüogo. Item tebilemstüji dang masü saka Naga nunger masüba purtemi Naga nüchiso bushir telok tenüng amer jajaba aser Naga nunger linük tenzükertemia nübortem nem timtem agütsüba tebilemstü indang kanga süoki ia jembitepogo. Iba nungji metenloka asenok ama tanga Naga kintemia Naga nunger tesünep nung yimjiyimjunga alitsü asoshi nungdakba onüktem benoka tain rongnung shisalemsatep tenzüksüla. Tangbo asenok Naga kin aikati tiyazü agi nütsüng aika akümtsü, tiyazü agi akoktsü aser tiyazü agi teyari lenmang bushitsüba onüktem indang jembir. Ajisüaka, tain adenshir tiyazü lima ka yanglutsü jembiba onük ya masü saka jokorla asenoki anir shitakba tain onük benoka shitakba Naga lima agi nüchipur aliba lima mesüka kümdaktsütsüba onüktem jembir tenzüksüla. Ajiang tanüa aser asünga tagitsü onük aser mapa asütsü.

## OLEMSABANG

### YISU OTSÜ: YISU ALIMAI ARUDIMA? HAU, SHITAK ARUTSÜ

~ T.N. JAMIR, Mokokchung

(Yashi adok nungi...)

Süra, tamalen shisemba ama Pa (Yisu) meimer menen alangzüksü alimai arutsü aser tepseta südaktsütsü aser shia arua kotaki atutsü ta Lai nung ashiba atalokogo aser Pa koma tanaben arutsü ta zülua alibaji shitak arutsü ta aseni amanger. Pa koma arutsü? T. Mapa 1:11 nung yamai zülua lir, "Galil nungertem kechiba anünglen ajia nenoki nokdaker? Iba kasa Yisu shiba nenok nungi kotaki anir atu, kechi koda Pa kotaki tuya nenoki nguogo, yamaji Pa meyipa arutsü." Pa arudangji meimchirtem shirnok temenen nungi temulung meyipa tanaben sor taküm merükteta tanela agi sünga lidir parnok ayipa atutsü. Meimchir tasürtem shia aruba ya temeshi nisung Elisha akidang asüba shi shizüka or tasümang teret takong nung kongshi nung shia aruba otsü amaji lir. II Chubatem 13:20 züngdangang.

Ano Yisu arutsübo yur Dawid o Solomon nunger masodang BC 600 shi nung Daniel-i shina lir. Aser ali nung mejanga alir jenti saksü; kar teti taküm dangi, kar maksü aser kar teti tatem makaba tesembatsü dangi shia arutsü. Lai nung shia zülua aliba ajak atalokmaogo, joko ayipa atutsü (rapture) dang anünga lir. Ano I Thesalonika 4:16 nung ashir, "Kechiyong washiba agi, tamarenba kotak nungi alutsü; aser Khrista nung asürtem tamasa shia arutsü" süra Yisui shitak arudima? Hau, shitak arutsü. Koma arutsü? Pa koma tuya angu yamaji arutsü (T. Mapa 1:11). Süra Pa arudang kong anentsü? Yimya agi ainer arukaji ka nungbo anentsü asünung, Pa atudang Olive tenem nungi atu aser yamaji Pa arudanga Olive tenem nung anentsü. Zakaria 14:4 nung ashir, "Menokonok tulu anoka Olive tenemji ana küma pakdang lenden tulu ka akümtsü aser yangji alua Pa tsüng ajemoktsü." Saka ya matalokdang kechisa asütsüar Yisui osangtajung pezü (4 gospel) prongla nung shia lir.

Yisu pei sasa yamai ashi, Ni arutsü aser ayipa atutsü, ayipa tuliji dang temeshi nisung ana, tenaji Yisu shia arudang ayipa tur kotak nung alirtem ta ashir, tena rongnung ka Mosa kaji temang tena atusang Elija ta ashir. Yamaji temeshipur ayipa tuli dang kotak nungi nisung anaji küm 3 sür tesadang alua Yirusalem yimdong nung sayutsüngitsü (Malaki 4:5/J.Adok 11:3-16). Iba sülen alima (global) ajunga nung Government tem ajunga anentsü. Modiba o Putin na tang yamai sentsüwangshiba yaa anentsü. Aji küm tenet reshikangshi (Jashikangshi) mapang ataloktsü. Idangji tang amshia aliba Pan card, Adhaar card ya anentsü; kechiyong iba ya negative asünung ya anener original koba 666 lir ya küm tenet (7) mapangji amshitsü. Ano Hagai 2:21-22 nung ashir, "Ni anüngtem aser alima anokshitsü; aser ni chuba yimlitem, chuba menden meküpdoktsütsü, aser ni kintem chuba yimli tashi raksatsütsü..." Süra Pa kechi sütsü arur? Kintem madak küm meyika yimsütsü arutsü. Koma ka yimsü asütsü? Pa mezüng arudangbo sentsüwangshi korang semer kintem madak merang ajok amer yimsü asütsü. Ayi korang melen sentsüwangshi korang, lisü melen merang ajok. Pa mezüng arudang teka tesülen perepa alener o bendangdaki anir ao, Pa tanaben arudang kintem madak o bendangtsü. Pa mezüng arudang yimdong nung meshimetsür (refugee) ka ta memeyong, teshinem menema nashi kidang anen; Pa tanaben arudangbo Hon temeja agi yangluba Dawid chuba menden nung amentsü. Pa mezüng arudang san chanu ama ajemalua tila kümer aru, saka tanaben arudangbo Molusongzü ama arutsü. Kechiaser Paji Yihuda Molusongzü. Lai nung shia aliba ama Pa arubaji ngua Yosef aser Pilat par kima ghonda jungnüa ajeba amaji kin ajaki pei teko nung tsünga ajebtsü. J.Adok 1:7.

AJIANG PA YAKTA ARUR

Shiri Pa menangzüki nü agi tsünga meta, item jagi jashiseta Messiaji angutsü. Aji oda kibong nung tanur ka dang alibaji asüadang ajeba ama ajebtsü. Yisui ashi, "Ajiang, ni yakta arur Halleluya" Kibur Yisu! Ne yimli arung, temeshipur Na aru yongyar aika lirko. Süra adianutem, asenoka koda, na aser ni tanaben soa alirtembo tang asünunga kotaki aotsü, saka kar danga tanaben mesoi lira pa aser labo anaben asütsü aser molumi-I aotsü.

Tsüngremi tazünger ajak moajang.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# 10buba Kingdom Leaders Prayer Breakfast Summit agiogo



October 07, 2023 nü Hotel Vivor, Kohima nung 10buba Kingdom Leaders Prayer Breakfast Summit (KLPBS) sentong nung Rev. Luoliehu Yimsung-i Naga nunger lenirtem atema sarasademtsüba sülen tangokba noksa nung angur.

**Kohima, Mongputeni/ October 07 (TYO):** Honibarnü Hotel Vivor, Kohima nung 10buba Kingdom Leaders Prayer Breakfast Summit (KLPBS) ayongzüka agiogo; iba sentong ya 'Thanksgiving, Unity, Servanthood' omen nung ajemdaker agi.

Iba sentong nung jembidang KLPBS tentetsang, Sydney, Australia nungi Rev. Luoliehu Yimsung-iyimtenren party balala nungi süaka lenirtem tsüngda telongjem alitsüla; loktiliba balala aser yimsü balala nungi lenirtem tsüngda telongjem alitsüla aser 'oshi ka nung obang ka ser jembitsüla', ta ayongzüik.

"Naga nungertemi masükümi Tsüngrem tsüngdang ajemalura asenok longjemtettsü. Asenok joko prokshia malitsüla saka longjemtsü mapang tongogo,"

ta pai metetdaksü. Paisa Naga nunger lenirtem dang peipei wadang nung pei tajaba tejangja meteta shidak tenzüksü ayongzüikba den külemi lenirtem dang kanga künküma alitsü, pei kibong, kiyimba, pei nübur, yimti aser linük kümzüksü ayongzüik.

Salem o jembidang Sheanghah, Mon District nung tongti Angh, Aloh Ngowang-i, iba sentong nung pa-a densemba atema pelaba lemsatepba den külemi state nung lenirtem dang kidanger linük den liromedema terenlok alitsü atema nendaka inyaksü aser longjema alitsü ayongzüik.

NPP National General Secretary, Dr. Andrew Ahoti-i nüburtem dang pei atema dang mebilemtsü aser lenirtem dang atangji chichiba lenir asütsü ayongzüik.

Paisa state nung temelenshi

alitsü atema mangdang tuluba ayutsü ayongzüik.

Sentong tetenzük nung Father's House Church nung Sr. Minister, Rev. Robert Kikon-i lokti pelaa agizükba o jembi aser State Chaplain, Rev. Yamyap Konyak-i temoatsü meshizüka sarasadema liasü.

Iba sentong ya Nune Kire leniba nung agi aser Rev. Fr. Benjamin Chang-i (Parish Priest, St. Mary's Parish, Lakhuti village) sentong tembanga sarasadem.

Sentong nungsa taoba mapang lenirtem nem akhüm agüja liasü aser MLA tem den party balala nungi lenirtem, loktiliba aser Arogo nung lenirtem atema temeja sarasadem agia liasü.

10buba KLPBS ya Environment, forest, climate change & village guard Minister, CLJohn-i sponsor asü.

## ANOGO ABEN TSÜNGREM DEN

### Taküm Tassen

Anungji nisung kar Khrista nung lira, pa tassen poktetba. Tejenbaji süiogo, ajiang, ajak tassen kümogo. 2 Korint 5:17.

Yisu ne mulungi aitag ta asüngdangba agi na khristan ka maküm. Kodang na tanaben aso, na Khristan ka aküm. Yisui ashi, "Atangji Zünpung ni ne dang shidi, tanaben mesora, nisungi Tsüngrem yimli mungutettsü" (Yn. 3:3). Sarasadem ka ashiba mesüra yimjak nung telemtetba agiba mesüra telemtetba agi card ka sign asüba agi na mekümzüksü. Tanaben asoba agi dang aji inyaksü akok. Tenyar Pauli ashir, kodang na "Khrista nung lidir" tejenbaji süitemer. Na tekümtet anguba anogo nung nai menaa aliba temenentem ajak adoker. Yirur na timtema aruba ajak tanebtsü angur. Nai tamakok ngua arua liaka temeim aser agizükba ne meyong akümer. Timtem tekangshi ajak joko mali moatsür.

Kari na tanela nung tanaben asoba tesüngmangtsüji nemaa kümdaktsütsü ashiba nai angashitsü akok. "Tang na "Khristan süa nai tesüiba nung kechisa ajangshia aru ajakji ajangtsü aser ibaji akoktsü mapang agitsü" ta mesüra, "Na tanaben asotsü akok saka maneni na temenen den rarateptsü, aser nai ne tashi mait nung takok angutsü ta yimlar.

Tebilemtsüji shibai na tanaben sodaktsür pa dangi asen taküm aotsü melen aseni merangba agi tanaben asotsü merangbaji lir. Na temenen nungi nüji akümstsü asoshi Laishiba nung tabensa kuli agütsübaji Yisu Khrista aser Tsüngremer chir asütsübaji teperi. Satani ibaji masü ta na mesüzüktsü bushir. Shiba dang nai amangtsü?

# Hamas kiralongrar teloki Israel amakba Khristantemi aitsür

**October 08, 2023:** Honibarnep Hamas kiralongrar teloki Israel amakba sülen alima lenirtem den külemi Khristan lenirtemia iba tatalokba aitsüogo.

Yashinep Gaza-Strip-i Israel amakba sülen Israel Ato kilonser, Benjamin Netanyahu-i, "Asenok tongbang nung lir," ta sangdonga liasü.

Hamas-i rocket aika amshia amakba mapang nung Israel nunger 250 dak tema asü aser 1,500 dak tema yiruogo. Iba sülen Israel-ia Gaza amakba mapng nung nisung 230 shi süiogo.

Hamas telokisa Israel nunger civilian aser sepai 53 puer ao.

Canterbury & York nung tongti putirtemi külem sangdong ka ajanga Hamas teloki Israel amakba aitsüba den külemi telok anaprongla dang atsü-anem akatsü ayongzüikogo.

Parnoki külem sangdong ka

ajanga, Israel aser Gaza nung rara atema onoki jashir aser tebilemtsü katsür. Onokisa Hamas teloki amakbaji sashia aitsür," ta metetdaksü.

"Mangyimertem aser yirua alirtem atema onoki sarasademtsür aser tetsübu nung alirtem atema sarasademtsür. Onoki telok ajak dang atsü-anem akatsü aser ajak atema yimjung alitsü asoshi asentenshir inyaksü ayongzüiker," ta sangdong nung shia lir.

Congress of Christian Leaders nungi Rev. Johnnie Moore-i Israel nung yimjung aser security atema rondak sarasadem agitsü par organization-i ayongzüikogo, ta metetdaksü.

"Israel pusema tan hopta tatembanglen alima tesem ajaklen Arogotem longjema Israel atema sarasademtsütsü," ta pai metetdaksü.

Anglican theologian, Phillip Blond-i X ajanga, "Islamism

ajanga maneni metetsümonga nüburtem tepseter - tangbo Israel nung tepseter. Parnok yimdong nung sadem-sadema senzüa kotari aser prangpong amshia tetsürtem aser tanurtem tepseter. Parnoki reshikangshiba aser tepsetba mapang parnok mapa tamajung pei sasa sentsüwangshitsür. Iba ya temenen jungkai adokba lir, anungji asenok ajaki raratsüla," ta metetdaksü.

Save the Parish nungi Rev. Marcus Walker-i X ajanga, "Tang Israel nung ozüing alema inyakbatem ya taoksatsüka lir. Yirusalem nung yimjung atema sarasademjang; parnok meimertem azükarutsü. Jara telung nung yimjung lidakjang," ta metetdaksü.

UK nung Arogo lenirtemia social media ajanga Yirusalem aser Palestine tsüngda tensa tajungba akümstsü atema sarasademjang, ta ayongzüikogo.

London nung Coptic

Orthodox Bishop aser UK atema Papal Legate, Archbishop Angaelos-i X ajanga, Isarel nung yimjung aser taneptsüba atema pai sarasademtsür, ta lemsatep.

Catholic Bishops' Conference of England & Wales Tir, Cardinal Nichols-i X ajanga, "Ni Gaza anaben semdangogo. Ni par nüburtem atema tebilemtsü katsür, kechiyong Hamas kiralongrartemi Israel amakba atema parnok meyipa angutsü. Rara ajanga kecha mebenetettsü. Mangyangba ajanga yimjung nung kecha meyaritsü. Iba yimjung atema tanü sarasademjang," ta ayongzüik.

Paisa, "Mangyimertem atema sarasademjang aser pua alirtem tangsa chiochtsü atema sarasademjang. Talisa Gaza yimti nung Khristantem atema sarasademjang," ta metetdaksü.

Yirusalem nung aliba

Arogotem nung tongti lenirtemia rara anentsü atema mepishir. Parnoki sangdong ka ajanga, "Asen yimsü ya Yisu Khrista tesayubatem nung ajemdaker tentetba lir, anungji rara tapu ajak anentsü atema asenoki inyaksüsa akümer," ta metetdaksü.

Parnokisa Palestine aser Israel naprongla dang temeshi tesemtem akhümstsübuttsü aser yimjung atema ken o jembi tenzüksü mepishi.

"Asenok ajaki Tenyar Pauli i jembiba o bilemtetdi: 'Kechiyong Tsüngremji raraba Tsüngrem masü saka Yimjung Tsüngrem lir' (1 Korint 14:33). Iba osang nung ajemdaker rara anentsü aser teti atema yimjung alitsü asoshi asenok ajaki ani-belem arema inyaksüla, koba ajanga Temeshi Lima (Yirusalem) ajanga ajak nem teimla, tamang aser temeim tesangwa agütsütsü," ta parnokisa metetdaksü.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Sangremertsük**

(n) modong mesükba tedong nung atangba tejang tila (grain of Chenopodium type weeds)

\* Alu nung sangremertsük memeyidaktsüsüla.

**Sangremsüyok**

(adj) asükwa mapang süir ajungbena ano asükwa aruba (cold wave just after winter)

\* Asükwa süiogo ta bilema alidang ajungbena sangremsüyok arur.

**OLONG PAITEP # 6661**

	1			2	3			
4			5					6
					7			
	8							
	9			10			11	
						12		13
14								
					15			

**TIPIEN**

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

**LANGTSÜNGLEN**

- 1. \_\_\_\_ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. \_\_\_\_ kibur - (5)
- 13. Tebur tembar tsüngda jatepba - (4)

**OLONG PAITEP # 6660 TELANGZÜBA**

**TIPIEN :**

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

**LANGTSÜNGLEN :**

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

**NAI-A YA METETTER MA**

**TANG TASAYADAK ICC WORLD CUP ASAYAR RONGNUNG TAMPUTI 5 ASER TANUPUTI 5 YAMAI LIR :**

**TAMPUTI 5 :**

- Ravichandran Ashwin (37 years, 18 days)  
Country: **India**
- Mahmudullah (37 years, 243 days)  
Country: **Bangladesh**
- Mohammad Nabi (38 years, 277 days)  
Country: **Afghanistan**
- Roelof van der Merwe (38 years, 278 days)  
Country: **Netherlands**
- Wesley Barresi (39 years, 155 days)  
Country: **Netherlands**

**TANUPUTI 5:**

- Matheesha Pathirana (20 years, 291 days)  
Country: **Sri Lanka**
- Dunith Wellalage (20 years, 269 days)  
Country: **Sri Lanka**
- Vikramjit Singh (20 years, 269 days)  
Country: **Netherlands**
- Aryan Dutt (20 years, 146 days)  
Country: **Netherlands**
- Noor Ahmad (18 years, 275 days)  
Country: **Afghanistan**



**Guwahati nung Adivasi telungpur 1,182 temai adok**



**Guwahati, October 8, 2023**

(Agencies): Guwahati nung aliba Srimanta Shankardev Kalakshetra International Auditorium nung Adivasi telungpur telok pungu nungi züngsemtem temai adokogo. Deobarnü agiba sentong nung telungpur 1,182 temai adok. Adivasi telungpur telok pungu ya Adivasi Cobra Military of Assam (ACMA), All Adivasi National Liberation Army (AANLA), Bircha Commando Force (BCF), Adivasi Peoples' Army (APA) aser Santhal Tiger Force (STF) lir. Iba sentong nung

telungpurtemi prangpong 304 den injang bener arua agütsü. AK series rifles, .303 rifles, SLRs, Carbines, G3 Rifles, Insas Rifles, LMGs, pistols, semi-automatic rifles, grenades, IEDs, RDX aser TNT agütsüogo. Adivasi telungpur teloktemi January 24, 2012 nung sorkar tsüngdang temai adok aser October 4, 2016 nung Suspension of Operation (SoO) nung sign sütepa liasü. Kümtem süia arudang Adivasi teloktem aser sorkar tsüngda olemtepa arur September 15, 2022 nung otsüsütsü aketba Adivasi Accord nung sign sütepa.

Adivasi Accord nung lateta aliba ama Assam sorkari May 22, 2023 nü züngsem 16 agi akümba Adivasi Welfare and Development Council tentetogo. July 6, 2023 nü Chief Minister Himanta Biswa Sarma lia Council züngsemtemi tezüngzüktep agia liasü. Chief Minister Sarma-i temai adokba telungpur 1,182 shia nem Rs. 4 lakh indang fixed deposit certificates agütsü. Iba sentong ya Home Department, Assam aser Special Branch, Assam Police ajanga ayongzük aser Chief Minister Himanta Biswa Sarma-i tongti tesemdanger ka ama aden.

**Manipur nung prangpong aser sen abener 3 apu**

**Imphal, October 8, 2023**

(Agencies): Manipur kübok Churachandpur district nung nisung asem ket nung prangpong aser Rs. 50,000 bena lia apu. 26 Sector Assam Rifles kübok Joint Command Post, Pallel ajanga intelligence senden ka amenba sülen par asem apu. Osang tejangja angazükba nung ajemdaker central security forces aser Manipur Police-i

October 7 aonung Churachandpur district kübok Bethel tesem mita ao. Idangji parnokki 5.56mm INSAS Rifle den magazine, 9mm country-made pistol den magazine, Rs. 50,000 aser Baofeng Walkie Talkie sets 2 den Maruti Baleno car (MN 06L 1378) apu. Par asem ya Kangpokpi district nungi Moun Vaiphei aser

Churachandpur district nungi Khaikholen o Tongkhai Baite nung lir ta jangaogoo. Parnok ajak Churachandpur District Police Station ket nung agütsüogo. Assam Rifles-i ayongba security senden nung Kakching Police, Chandel Police, BSF, aser Manipur tesem balala nung mapa lemezuka aliba Assam Rifles columns ketdangsurtem aden.

**Taoba MLA Emmanuel Mosahary-i BJP toktsüogo**

**Guwahati, October 8, 2023**

(Agencies): Assam nung taoba Member of Legislative Assembly (MLA) Emmanuel Mosahary-i Deobarnü Bharatiya Janata Party (BJP) toktsüogo. BJP-i pa senzuka yutsüba atema iba lemtet agi ta Mosahary-i Tamulpur pres club nung osangbener den jembidang ashi. "Ni jungjunga bilemdangba sülen BJP toktsüsü lemtetogo.

November 22, 2020 nung ni BJP nung aden aser party mapa ajak aser talisa Council elections o MLA elections nung shilem agia aruogo" ta Tamulpur constituency nungi taoba MLA Mosahary-i ashi. "Ni külem züngsemtem den teküpoktiba jenjang nung anibelem arema mapa inyaka aruogo" ta paisa ashi. "Tesasatsüka state level nunga ni mesüra külem

züngsemtem senzuka yutsü. Tesüiba ajak reprangdangba sülen ni BTC region nung Bodoland People's Front (BPF) ang regional party tajungba ta bilem. BPF ajanga dang asenoki nübor tenzüktettsü anungji ni BJP toktsüba shidi agütsür" ta Mosahary-i metetdaksü. Assam nung Assembly elections magidang November 2020 nung Emmanuel Mosahary-i BJP nung aden.



Council on Monuments and Sites (ICOMOS) nungi UNESCO specialist Lim Chen Sian-i Honibarnü Charaideo district kübok Maidams tonga arudang pelaa agizükba angur. Sian-i anogo ana tashi Charaideo Maidam tesem semdangtsü. Charaideo Maidam nung chubar kibong nungi nisung 90 tema rema lir aser iba dang Pyramids of Assam ta ajar. India sorkari iba tesem ya UNESCO World Heritage Site asütsü shidanga lir.

## Hamas-i Israel amakbanung Iran, Russia aser China shilem lir

**Mongputeni/Oct. 08 (Agencies):** Honibarnü nungi tenzüka Palestine nung aliba Hamas teloki Israel dak kanga sashia amakba nung Russia, China aser Iran linüktemi tongti shilem agia lir ta itdangiter temi asadangteter.

Iran-i Hamas nem yimjak nung training agüja yimtenren tsütsü yari, Russia ya Hamas den anasatepa aliba meteta lir, aser iba lendong agütsüba nung China nung technology amshi.

Jewish nung asoshi tongtipang benjong Sukkot mapang Islamit telok ya ali, tzi aser anüing nungi Israel telungi ai. 1973 küm Yom Kippur War sülen küm 50 ser anogo ka lir iba lendong ya ataloker, aser Yom Kippur rara ya aoksa tenzüka liasü. Jewish calendar nung Yom Kippur ya temeshitiba anogo lir.

Honibarnü amakba ya Israel nung rockets 2,000 dak tema khalokja tenzü. Yamaji khaloktsüba mapang Gaza nungi ali nungi kanga kumdanga ground operation

tenzüka Israel nung jila 20 dak tema aser anasa aliba army bases tem amak. Tang tashinung Israel nung nisung asüba 659 lir aser 2,156 dak tema yirua lir.

Hopta ishika tejakdang Turkey-i Hamas nem tapoktsü osettem (bomb) agütsü ta osangtem lir. Israel-i itemji khazüka yokdang shingia iba indang mejembi. Ajidang masü Turkey Tir Recep Tayyip Erdogan ya miima United States-ia ogo aser iba indang temai madok, ta itdangiter temi ashir.

"Yangi tamakok balala meyokteper lir. Global partners, talisa Five Eyes-ia khen danga Israel dang iba lendong ataloktsü indang mashi. European linük kar Arab linüktem den tesendaktep lir. UK, Canada, Jordan, Egypt, Bahrain linük temi Israel meyaritet," ta ashir.

Tasüngdanga tuluka tang temai adokbaji, kodasen Israel tempa linük temi itdangiterba osang magütsütet. Israel indang itdangiterba agency

Mossad indang agents tem ya tesem ajaklen lir, anungji rockets meyirijang dak tema arütsü alema aittsü ya tamakoktsü, ta ashir.

Osang ajangasa ashiba agi, arütsü sapokdaksüba ya tamakok ka lir. System ajunga raksatsütsü asoshi Chinese Trojan amshi aser parnok lenmang pezüsü len nungi ait.

Israel cyber security nung aiben timtem ajurua liasü aser tang tesüsa timtem ajuruba agi nisung ajak süngmang.

Israel-ia tayang kepzüka Gaza nung tayimtsü amshia amakba ajanga yangji nüburtem kanga tim atemer.

Israel meyong jets temi Gaza nung ki o jen aika raksatsüogo.

Tang tashinung Palestine nung nisung 380 dak tema tepsetogo aser 2,200 dak tema yirur lir, ta Palestinian Ministry of Health ajanga ashir.

Gaza nung kilen shilem 80 shi nung electricity mali. Gaza anüdoklen alirtem dang Israel ketdangsürtemi tekeraba nung ainshitsü phone nung message yoker.

## MULUNGEN O



Onoki teti meima aliba jabaso **Imtinok Jamir** (Mongsenyimti), October 2, 2023 anogo nung ajungbena alima nungi piladang, asü lendong nung aser ozü asükhü mangyim jashi mapang kidang kiyongertem, yimtsür-yimertemi anir ana aser talang nungi Arogo, lokti, temba-tinu, Straightway School Administration, Classmate-tem, kija aser kibong kwikati nübu aser rongsen tulu tenla-a yaritepogo, nenok ajak dang kangasa pelaba lemsateper. Nenok mapa tajung yari ozüi meyipa agütsütsü kecha maka aser tsüngdong arua pelaba melemsateptet nung iba sabang ajanga ozü mulungjang taroktiba nungi nenok ajak dang "**Kanga Pelar**" ta lemsateper.

Nenok teyari aser sarasadem ajanga ozü mulung zürep süneptsür. Tulusang Tsüngremi nenok ajak molamoshia moajangma ta onoki sarasademtsür.

~ **Temeim Tsüraburtem, Tenu, aser Kinungertem.**

## Biden tashi maitba agi kiralongrar temolung ulur: Trump



**Waterloo, Mongputeni/Oct 08 (Agencies):** Israel amakba

mapang taoba US Tir Donald Trump-i tang teinyakdak Tir Joe Biden tenüing asen aser pa tashi maitba ajanga kiralongrar temolung ulur, ta ashir. Hamas teloki Honibarnep Israel amakdang nisung 300 dak tema asü aser nisung 1,590 yirua liasü.

Honibarnü Cedar Rapids, Iowa nung rally ka nung jembidang Trump-i iba rara aitsü aser künü anogo Palestinian kiralongrar dangi senotsü aoba anentsütsü nangzük.

"Kiralongrar temi Israel litsü amakba aser Israel sepai aser nüburtem tepsetba ya tazü mapa lir aser iba ya samatsütsü, aser samatsütsü aser tayang kepzüksüla," ta pai ashir.

"Tir ka ama ni maneni Israel den nokdaksü aser Palestinian kiralongrar dangi sen aoba künü anogo rakdaksü," ta ashir.

Trump, shiba taruba küm elections agitsü lia pa anema ken o aika benoka lir, pai Waterloo nung Republican rally ka nung ashiba agi, Biden-i alima sapang nung US tashi mait ama reprangdaksür, ta ashir.

"Asenok tashi mait aser lenir tashi mait ta angateta Israel amak," ta pai ashir.

Honibarnü Hamas-i ajungbena Israel nung ali, anüing aser tziyim nungi amak tenzü. Iba mapang Israel nung 300 dak tema asü aser tayang kepzüka Gaza amakdang Palestine nungera noklang aika asü.

Biden-i indang-indanga mesiaka iba lendong ataloktsü

senotsü agütsü, ta Trump-i ashir. "Tejashitsüka American taxpayer ajanga item lendong agütsüdaksür, aser item osang ya aika Biden Administration nungi arur ta ashir," ta Trump-i ashir. Taoba ita tepuokdak alir melentepba nung shilem ka ama Iran nem sen billion \$6 agütsüba yagi Hamas yari ta Republican temi ashir.

Trump-i aitsüba langzua White House Deputy Press Secretary Andrew Bates-i ashiba agi, party anaprong lungjemer Israel kumzüka ayutsü merangtsü mapang ka nung iba ama jembiba ya taksüka tiaziü lir. Sen ya chiyongtsü aser mozü ama meimchir nüngdakba tejangja aliba nung dang amshitetsü, ta Bates-i ashir.

Palestine telungpur telok, Hamas-i kiralongra mapa inyaka Honibarnü Israel amakba anema akang-akanga nokdaksü ta US Tir Biden-i nangzük US mitkar teyari tangsa yoktsü ta sangdonger lia Trump-i iba o ya ashir.

Mitkar tsütsü teyari agütsütsü atema US aser Israel ketdangsürtem tsüngta jembishinü tenzüko.

"Kiralongrari amakba mapang Israel nübur US den lir ta ni Israel Ato Kilonser Benjamin Netanyahu dang shiogo. Kü indang administration nung Israel indang security bhukumba akang-akanga longtem ama manokshi lir. Par nüburtemi nüngdakba nung yaritsü aser maneni par sasa par kumzüka ayutsü asoshi reprangtsü," ta Biden-i ashir.

## Afghanistan menoknok lendong nung asür 2,000 jungogo

**Kabul, Mongputeni/October 8 (Agencies):** Afghanistan antiölen menoknok tesashi ka anokba sülen asür 2000 dak jungogo, ta Taliban lenir kati ashiba den, asürtem timba akümsü akok, ta shisem. Küm metsü shi nung tang menoknok tesashiba agi Afghanistan kongshio.

Qatar nung Taliban otongdar Suhail Shaheen-i Al Jazeera dang ashiba agi, 6.3 magnitude ka agi Herat province kongshiba sülen nisung aika samara bushidar aser ki chireper aliba nungi nüburtem kümzüksü atema inyaktepdar.

Shaheen-i ashiba agi, menoknok agi kongshir aliba tesemtem nung tang süki, mozü aser chiyongtsü nüngdaker. Paisa, local shishilembartem aser NGO tem dang nüngdaka aliba nüburtem nem teyari agütsütsü mepeshia metetdaksüogo.

Deobarnü nüburtemi Herat nung asürtem aser yirur alirtem tutetsü merangdanga liasü. Asürtem aser nüburtem aika ki chireper aliba nung sabanga lir.

Online nung lemsatepba video ka ajanga ki techirep ka nung tetsür chanu ka tekong tashi jana agi nembanger aliba agitetba sayuogo.

Tekümzükertemi tetsür chanula agitetba mapang teka ka agi tanutsüla memshia aliba nguogo. Tekümzükertemi ashiba agi iba ya tanutsüla tetsü teka liasü. Tetsü ya kümzük mekümzük iba indang osang tejangja memetet.

"Menoknok lendong nung nisung 2,060 asüba den nisung 1,240 yirur lir aser ki 1,320

ajunga ajarepogo," ta Ministry of Information and Culture otongdar Abdul Wahid Rayan-i ashir.

Yimtsüng trokshi raksaogo aser nüburtem noklang aika ki chirepba nung sabanger lir ta pai ashiba den, teyari meshia liasü.

Honibarnü 11 ako shi nung Herat yimti northwest len km 40 shi pilar 6.3 magnitude menoknok ka anoka liasü, ta US Geological Survey (USGS)-i ashir. Kidanger Badghis aser Farah province nunga aftershock tesashi aruba ajangshio.

Military aser Red Crescent amala lokti tentetem densema tekümzüka maparen balala inyaksü atema team aika aritepa iba tesemi ogo.

United Nations migration agency-i, ambulance pezü den doctor aser psychosocial support counselor tem regional hospital kati yokogo. Zenda Jan district-i mobile health team asem yokogo. Iba district ya ajak dang tamajungtiba kongshia liasü. Afghanistan nung World Health Organization unit-i ashiba agi, parnoki yirur alirtem mozükidangi anir aotsü atema Zende Jan-i ambulance 12 yokogo.

Doctors Without Borders-i, Herat Regional Hospital nung medical süki pongu amenokogo, kong nisung 80 temang anepalutetsü. Agency-i ashiba agi, ketdangsürtemi yirur alir 300 dak tema temang anepalutsüogo.

Afghan Red Crescent Society otongdar Irfanullah Sharafzai-i ashiba agi,

tekümzüka maparen nung team tenet mazüingi inyakdar aser tanga team tem Herat anasa aliba province ti nungi adenshidar.

"Pei ki chireper tejenokdak nüngdaka alirtem asoshi khen atema camp ka amenoktsüogo," ta Sharafzai-i Associated Press dang ashir. "Timtem mapang nung sensaker aser nüngdaka aliba nüburtem nem onoki takokba tashi teyari agütsütsü," ta paisa shisem.

Herat yimti nung alir Abdul Shakor Samadi-i ashiba agi menoknok anokba sülen anü teruto shi nung ano aftershock tesashi pongushi ajangshia liasü.

"Nüburtem ajak pei ki toktsür jenshi. Ki, office aser dokan ajak tazüing lir aser ano menoknok anoktsü akok ta bilema tsübuteper. Ni ozü kibong den ki telung nung liasü. Nia menoknok anokba ajangshio," ta Samadi-i ashir.

Par kinunger ajak tsübutepa kimai jena tugo aser ki telungi meyipa aitsü tsübuteper, ta pai ashir.

USGS-i menoknok anokba sülen ano 6.3, 5.9 aser 5.5 magnitude aftershock tesashi asem aser iba dang nungi tashimaitba menoknok kar ajangshia liasü, ta metetdaksü.

Taliban-i shimba deputy prime minister for economic affairs-i asür kinungertem den asükhü lemsatepogo.

Kasa mapang nung Afghan nung nüngtugu cricket asayar Rashid Khan-i ashiba agi, pa Cricket World Cup nung asayaba taa ajak Heart menoknok lendong nungi jenbortem nem agütsütsü.



19buba Asian Games shibangba sentong Deobarnü 'Big Lotus' Stadium nung kanga takjok ngua agiogo. Taruba Asian Games ya Aichi-Nagoya (Japan) nung asayatsü. Iba asayamung nung taküm linük 45nungi asayartemi asaya balala nung shilem agia liasü aser China team-i medal timtiba ngutetogo. Iba asayamung nung India team-ia tang mezüngbuba medal 100 dak tema ngua medal 107 nguogo, kong gold 22, silver 38 aser bronze medal 41 densema lir.

## Wayne Rooney-i D.C United coach mapa toktsüogo

**Mongputeni/October 8, 2023 (Agencies):** Taoba England nung international asayar Wayne Rooney-i Major League Soccer club DC United coach mapa toktsütsü. DC United pur playoffs atema qualify mesütetba sülen pai coach mapa toktsüogo.

Club aser Rooney na tangatetep nung pai mapa toktsüogo, ta club sangdong ka ajanga metetdaksü.

"Onoki Wayne den sensaksemogo aser pila tajungba asütsü ta mulungtepogo. Iba telemtetba agiba ajanga taruba General Manager nem yimya aser tebilemdangba tasen benoka inyaksangshitsü atema maongka agütsütsü, koba Head Coach tasen ka bushiba nungi tenzüksü," ta club indang CEO aser co-chairman Jason Leven-i ashi.

"Rooney-i mezüng club nungi asayar aser captain liasü aser iba sülen coach ama team aser linük yimtiba nung soccer asoshi kechasa inyaksüogo, item ajak asoshi pa dang kanga pelar.

"Pa DC United kibong nung maneni tongtibang shilem ka lir," ta paisa shisem.

Kasa mpang nung Rooney-i osangbenertem dang ashiba agi, jenjang agitsü asoshi tang mapang shitak lir.

"Tang ya mapang shitak lir. Ni club playoffs tongdaksütsü atema takokba tashi inyakogo," ta taoba Manchester United forward Rooney-i par team iba season nung tatembangbuba asaya nung New York City FC goal 2-0 agi akokba sülen ashi.

Rooney ya English club Derby County indang manager liasü saka club rongsenketzüng nung timtem adokba sülen pai 2022 küm June ita mapa toktsü.

Iba sülen ita ka lir pa DC United nung dena liasü. Pa iba club nungi 2018 aser 2019 küm asayaogo.

Pai coach mapa agizükba mapang par team pur Eastern Conference nung ponglang nungi tanabuba nung liasü aser taoba season parnok ponglang nung tembanga liasü.

Taküma team-i imlaba ama junga masayatetaka team pur

tekububa nungbo lir, ajisüaka tanga team tem ano asaya kaka asayatsü anunga lir asünung parnok playoff atema qualify asütsü asoshi kecha timla mali.

Arishi küm 37 tain Rooney-i osangbenertem dang ashiba agi, pa tarutsü atema kecha sentong mali saka pa England-i meyipa aotsü ta shiogo.

"Tarutsü kechi koda asütsü iba indang ni kecha memetet. Ni media nung osang aika nguogo. Ni tarutsü kecha memeteti meyipa aoer.

"Ni club nung staff, asayartem aser club dak sendaka alirtem ajak dang kanga pelaba lemsateper," ta pai ashi.

Rooney-i taoba ita pa indang contract tembangba dak sendakba nung kecha sensaksem makaba atema tezü atanger ta shiogo.

Taoba küm October ita Lucy Rushton mapa nungi anentsüba sülen club general manager makai aruogo aser soccer operations tir Dave Kasper aser technical director Stewart Mairs nati inyakyim ajak achaayanga aruogo.

## India tebur hockey team, support staff nem sen lakh pongungu agütsütsü

**Mongputeni/October 8, 2023 (Agencies):** Hangzhou nung 19buba Asian games nung India tebur hockey team-i otsütsütsüsa gold medal anguba sülen Odisha Chief Minister Naveen Patnaik-i tanü asayar aser support staff ajak nem sen lakh pongungu agütsütsü nangzükogo.

Iba asayamung nung India tebur Hockey team-i kanga junga asaya gold medal anguba den 2024 Paris Olympics nung asayatsü atema maongka ngutetba tenüng nung parnok senpettsütsü nangzükogo.

Final nung India team-i

defending champion Japan team goal 5-1 agi koka liasü.

Medal agütsüba sentong tembangba sülen Patnaik-i India team dangi video call süa jembia liasü. Chief Minister-i parnok nem tenüngsang agütsüba ajanga team kanga pelatepa liasü, ta Chief Minister's Office (CMO) sangdong ka ajanga metetdaksü.

"India tebur hockey team nem tenüngsang agütsür. Bendanga agüja meranga inyakba ajanga Hockey ya India nung asaya ta kuli agütsüogo. Odisha kong hockey asaya kanga tongtibang lir, iba tesem

nung tanü takok tajung ngutetba ya onok mulung nung teti alitsü. Taruba küm Paris Olympic Games atema India team kanga junga renemshia atatsü imlata," ta Chief Minister-i ashi.

Küm teku ataba sülen India-i tang iba asayamung nung gold medal ngutetogo. India team-i 2014 küm final asaya nung Pakistan team koka gold medal ngua liasü.

2018 küm nungi Odisha-i India hockey team tem sponsor süa arudar aser parnok world cup ana densema tongtibang asayamungtem nung team nongita yaria arudar.

## Badminton Jr Worlds: Ayush Shetty-i bronze medal angu

**Mongputeni/October 8, 2023 (Agencies):** Deobarnü BWF World Junior Championships nung India nung asayar Ayush Shetty-i bronze medal ka nguogo.

Final asaya nung Ayush aser asayamung nung fourth seed Indonesia nung asayar Alwi Farhan na kanga toktepa asaya liasü.

Mezüngbuba game nung asayar ana meneptepa asaya aser 16-16 tashi point kasasa liasü. Iba sülen Farhan-i aibelen mesüi tajungba asayateta points ishika kanga kara angu aser asaya 18-21 agi koka liasü.

Asaya tanabuba set nunga Alwi-i maneni tajungba asayateta pa 4-0 agi tejakdang ser asaya tenzüik. India nung

asayar yagi takok tashi meranga asaya-a point 13-13 ta kasasa aküm. Ajisüaka iba sülen pai junga masayateti Alwi nem points aika agütsü aser asaya 15-21 agi mekoki liasü.

Ayush ya BWF World Junior Championships nung Medal anguba India nung asayar 10buba aser tebur asayar 8buba kümogo.

India nung asayartemi iba asayamung nung medal 11 ngua lir, kong Saina Nehwal-i 2006 aser 2008 küm silver aser gold medal anguba densema lir.

Taoba kuma Spain nung iba asayamung asayaba mapang India nung asayartem rongnungi S Sankar Muthusamy Subramanian-i silver medal ka ngua liasü.

## Iga Swiatek-i China Open kokogo



**Mongputeni/October 8, 2023 (Agencies):** Deobarnü Beijing nung China Open tetsür kija asaya final nung Iga Swiatek-i straight sets nung Liudmila Samsonova kokogo.

Swiatek-i taküm asayamung pongu kokogo aser maneni world number 1 asayar akümstü asoshi point 465 agi dang Aryna Sabalenka memenepi lir.

Iga Swiatek-i taküm asayamung pongububa ya 6-2 6-2 agi koka liasü.

Beijing nung takok anguba sülen Swiatek-i WTA tour title pongububa bena taoba taoba küm den kasa kümogo.

Serena Williams-i 2014 aser 2015 küm asayamung pongungu akokba sülen tang mezüngbuba Swiatek-i küm anabuba atonga asayamung pongungu kokogo.

Swiatek-i semifinal asaya nung US Open champion Gauff koka final tonga liasü.

World rankings nung Swiatek tang Aryna Sabalenka sülen tanabuba jenjang nung lir, saka taküm lai Roland-Garros nung Grand Slam ka akokba den Doha, Stuttgart aser Warsaw

nunga takok tajung ngutetogo.

Taküm final tenet asayaba mapang Swiatek-i la indang career nung title 16buba kokogo aser lai tang tashi nung Samsonova den asemben asayaba asemben prongla kokogo.

Arishi küm 24 tain Samsonova-i semi-finals nung Elena Rybakina tsükdaksü aser China nung final tonga asayaba sülen la rankingsa nung top 20-i aitsü.

Asaya mezüngbuba set nung game pongu tashi kasa asaya atuba sülen Samsonova-i double-fault ka mena-a Swiatek nem la indang serve break südaksü, shibai mezüngbuba set nung unforced error ka danga memena aser ano maneni serve ka break süa asaya akok.

Tanabuba set nunga Swiatek-i kanga junga asaya tenzüik aser la 3-1 agi tejakdang liasü aser taruba game nung la indang serve break mesüdaksüi 4-1 agi tejakdang aküm aser asaya akok.

Final asaya ya Swiatek-i minute 69 nung koka liasü.

**BILEMDANGANG**  
"Yimjung melira terenlok malitsü."